

1260-1260- OFP - Acta Capitulum Generalium apud Argentinam Celebrati

In nomine patris et filii et spiritus sancti. Amen.

Acta capituli generalis apud Argentinam
celebrati anno Domini · M° · CC° · LX° ·

Confirmamus has constitutiones. In capitulo de electione diffinitorum capituli generalis et provincialis, ubi dicitur, aliquis de magis ydoneis a capitulo eligatur, deleatur, a capitulo eligatur, et totum quod sequitur usque, cui socius, et dicatur sic, aliquis de magis ydoneis a maiori parte capituli eligatur, qui sit generalis capituli diffinitor. Et hec habet · iii · capitula.

Item hanc. In capitulo de predicatoribus, ubi dicitur, ad exercitium autem etc, deleatur totum, usque ad illud, nullus autem. Et hec habet · iii · capitula.

Item hanc. In capitulo de studentibus, ubi dicitur, nullus fiat publicus doctor, deleatur quod sequitur, nisi ad minus theologiam audierit per · iiiior · annos, et dicatur sic, nullus fiat publicus doctor, nec disputet etc. Et hec habet · iii · capitula.

Item hanc. In capitulo de inclinacionibus, ubi dicitur, quippiam vestimenti tribuitur profunde inclinantes, etc, deleatur, profunde. Et hec habet · iii · capitula.

Item hanc. In capitulo de electione prioris provincialis, ubi dicitur, de quolibet conventu, ad hoc idem electis, addatur, a maiori parte conventus, omnibus fratribus etc. Et hec habet · iii · capitula.

Item hanc. In capitulo de cibo, ubi dicitur, a cellarario vel ministro, removeatur, a cellarario vel ministro, et dicatur, a servitore. Et hec habet · iii · capitula.

Item hanc. In capitulo de conversis, ubi dicitur, scapularia longa et lata, addatur, usque ad iuncturam inter pugnum et brachium. Et hec habet · iii · capitula.

Approbamus has. In capitulo de visitoribus, ubi dicitur, in capitulo provinciali predicto modo eligantur, deleatur predicto modo, et dicatur sic, secundum formam diffinitorum capituli provincialis positam eligantur. Et hec habet · ii · capitula.

Item hanc. In capitulo de suffragiis, in principio ubi dicitur, a festo sancti Dyonisii usque ad adventum, pro anniversario fratrum, addatur, et familiarium, receptorum per litteras ad beneficia ordinis, clericus psalterium, etc. Et hec habet · ii · capitula.

Item hanc. In capitulo de electione prioris conventualis, post illud, ubi dicitur, admittantur ad electionem predictam, addatur, electio autem tam priorum provincialium, quam conventualium, ad illos tantum pertineat electores, qui personaliter presentes in electione extiterint, sicut fit in electione magistri. Et hec habet · ii · capitula.

Inchoamus has. In capitulo de silencio, ubi dicitur, seu regum, addatur, aut reginarum.

Item hanc. In eodem capitulo post illud, sive etiam magistri ordinis, addatur, et ministri generalis fratrum minorum.

Item hanc. In eodem capitulo post illud, cum contigerit nos cum illis comedere, addatur, prior autem provincialis ad loquendum licenciare poterit unum fratrem.

Item hanc. In capitulo de recipiendis conversis, ubi dicitur, sine licencia prioris provincialis, addatur, et dicatur sic, nec conventus aliquis recipiat conversum, sine licencia magistri ordinis, vel prioris provincialis.

Item hanc. In capitulo de levi culpa, ubi dicitur, ad gradus altaris non satisfecerit, deleatur totum hoc.

Item hanc. In eodem capitulo, ubi dicitur, magistri in docendo, deleatur, magistri, et dicatur, doctores.

Item hanc. In capitulo de gravissima culpa, ubi dicitur, de nostra societate prohibeatur, deleatur totum quod sequitur usque ibi, hic autem habitu exutus, etc.

Item hanc. In capitulo de apostatis, a principio ubi dicitur, quicumque apostataverit, deleatur totum quod sequitur usque, si infra · xla · dies non redierit; excommunicabitur, et dicatur sic, quicumque apostataverit; ipso facto sit excommunicatus, quam sententiam ex nunc ferimus presenti statuto.

Item hanc. In eodem capitulo, ubi dicitur, non predicet nec audiat confessiones, addatur, nec ad aliquam electionem ordinis, nec ad aliquem tractatum eorum que mittenda sunt ad generale vel provinciale capitulum, admittatur, nisi per diffinitores, etc.

Item hanc. In capitulo de domibus concedendis, post illud, nisi in die consecrationis ecclesie, addatur, et tunc tantum liceat eis ingredi chorum et claustrum.

Item hanc. In capitulo de electione prioris conventualis, post illud, si vero priore mortuo vel amoto, addatur, vel absente. Et infra, ubi dicitur, et domus supprioris caruerit, addatur, et vicario, tres fratres, etc. Et infra, ubi dicitur, prior provincialis, addatur, vel conventualis aliter ordinaverit.

Item hanc. In capitulo de electione prioris provincialis, post illud, hoc excepto, quod eos includi sicut in electione magistri, non oportet, addatur, unus autem de illis duobus electoribus illo anno in socium prioris conventualis ad provinciale capitulum eligatur; si tunc fuerit celebrandum.

Item hanc. In capitulo de capitulo provinciali. post illud. si priorem provinciam abesse contigerit. nec vicem suam alicui commiserit. addatur. vel ille cui commiserit aliquo casu absens fuerit. prior illius loci. etc.

Item hanc. In eodem capitulo. post illud. alias enim sententia plurium prevalebit. addatur. si vero tractatus de aliquo ipsorum fuerit. et · iiiior · reliqui inter se discrepantes in partes dividantur equales. advocent unum priorem presentem in capitulo. alium a diffinitoribus. qui prius habitum nostri ordinis suscepit. et cui parti consenserit; illorum sententia prevalebit.

Item hanc. In capitulo de sollempni celebratione capituli. ubi dicitur. in fine fiat communis confessio. perseverantibus benedictio et absolutio. totum quod sequitur deleatur usque. et hec eadem forma. etc.

Item hanc. In capitulo de capitulo generalissimo. ubi dicitur. vel magistro. addatur. cum media parte provincialium visum fuerit expedire.

Item hanc. In capitulo de capitulo generali. post illud. si autem per adiunctionem magistri. partes fiant equales. unus eligatur. addatur. a diffinitoribus secundum quod in electione. etc.

Item hanc. In capitulo De itinerantibus. post illud. nisi de licencia magistri. vel capituli generalis. addatur. vel prioris provincialis pro arduis negociis sue provincie. sed mittatur nuncius. etc.

Item hanc. In capitulo de studentibus. post illud. circa aliquos voluerit magister ordinis vel capitulum generale. addatur. vel prior provincialis aliter dispensare voluerit.

Item hanc. In calendario. quod in crastino Basilidis. Cyrini et Naboris. scilicet idibus iunii. scribatur sic. festum Antonii confessoris de ordine minorum. tres lectiones. Et etiam in martyrologio eodem die. addatur. et dicatur sic in fine. eodem die beati Antonii confessoris de ordine fratrum minorum.

Item hanc. In capitulo de studentibus. post illud quod dicitur. vel questiones proponendas. addatur. vel collationes ipso presente faciendas.

Item hanc. In capitulo de predicatoribus. post illud quod dicitur. omnis qui iam ad dictum officium predicacionis. usque ad illud. placitis et causis. etc. deleatur totum.

Item hanc. In capitulo de visitoribus. in principio. post illud verbum. eligantur. addatur. nisi priori provinciali et diffinitoribus velint committere.

Admonemus. quod diffinitor capituli generalis. per disquisitionem. sicut in constitutionibus est traditum; eligatur.

Item. Diffinitor capituli generalis. in suo provinciali capitulo. causas constitutionum inchoatarum. et approbatarum. et monitionum exponat.

Item. Constitutiones. aliquando legantur in mensa. maxime. cum fratres sint ibi melius congregati. proviso quod alie religiose persone. vel seculares. non assint. nec audire possint.

Inhibemus. ne hospitibus. vel minutis in domo hospitum; pulmenta cocta cum carnibus ministrentur.

Item. Misse votive. cum pulsatione campane non dicantur. nec due misse cum nota. nisi pro scholaribus vel congregacionibus. diebus dominicis celebrentur.

Item. Conventus provincialiarum. in quibus non est sufficiens copia lectorum. lectores quandiu possunt legere. non eligant in priores. nec priores provinciales sint faciles ad confirmandum eos. et admoniciones facte de studio in precedenti capitulo generali; diligentius observentur.

Item. Cultelli curiosi. vel sumptuosi. et tabule cum speculo. vel crucifixo vel alias curiose. et almucie preciose. et capelli omnibus fratribus infra quindenum. a prioribus. vel eorum vicariis auferantur. nec deinceps habeantur.

Item. Priores provinciales quando vadunt ad capitula generalia. vel ad alia loca remota. ordinent ita de vicariis quos dimittant; quod si unus moriatur. vel alius a vicaria impediatur. alius succedat illi mortuo. vel alias impedito. et si necesse fuerit simul et semel ponere duos; expriment quem illorum velint locum suum in capitulo provinciali tenere.

Item. Si forte petatur absolutio prioris provincialis vel conventualis; scribantur nomina petencium. et non petencium.

Item. Antiqua scapularia fratrum conversorum. infra · xv · dies postquam hoc scriverint per priores corrigantur; secundum formam constitutionis noviter confirmate.

Item. Priores provinciales cum diffinitoribus hoc anno faciant aliquam ordinationem. ubi facta non est. ad cohibendum discursum fratrum. et ubi facta est; servari faciant diligenter. vel faciant meliorem.

Item. Fratres qui mittunt nuncios ad magistrum; ita provideant. quod pro sustentacione sua. aliquid non petatur ab eo. et super hoc; instruant eos fratres.

Item. Mandat magister. quod fratres utantur legenda beati Dominici que inserta est in lectionario; et alie deinceps non scribantur.

Item. Caveant fratres. ne scribant procuratori ordinis pro amicis qui volunt in curia beneficia impetrare.

Concedimus unam domum in Zelandia. si placet priori provinciali Theutonie. et diffinitoribus. Item provincie Polonie unam in Boleslavec.

Absolvimus priorem Treverensem et ieiunet · iii · dies in pane et aqua et celebret · iii · missas.

Capitulum generale sequens assignamus apud Barchinonam in provincia Hispanie.

Actis additae sunt litterae magistri ordinis; cf. app. n. XII.